

01. juni 2017

Nunatta Karsiata 2016-imut naatsorsuutaasa Inatsisartunit akuerineqarnissaat pillugu Inatsisartut aalajangiiffigisassaattut siunnersuut.

(Aningaasaqarnermut akileraartarnermullu naalakkersuisoq)

Siumumiit Nunatta Karsiata 2016-imut naatsorsuutaasa akuerineqarnissat pillugu inatsisartunut aalajangiiffigisassatut siunnersuutip siullermeerneqarnerani imaattunik oqaaseqaateqassaagut:

Ukioq 2016 kingumut qiviarlugu Nunatta Karsiata naatsorsuutai nalilerutsigit iluatsiffioqaaq. Nunatta karsia naatsorsuutigisamiit 311 mio. kr. isertinnerusimavai. Taamaamat patsisissaqarluarpugut kikkulluunniit suleqataalluarsimasut, sulineri tunniussaqaqarluarnerinni peqataasimasut immikkut nersualaassallugit.

Siumumiit pingaartilluinnagaraarput akisussaassusilimmik aningaasaqarnermi politikikkut ingerlatsineq minnerunngittumillu ineriartorneq inuiaqatigiinnut pitsaasumik ingeriartornermik ataavartuusussamik aningaasaliinertalik.

Naalakkersuisooqatigiit, qinigaaffimmi uani, ineriartortitsisimanerisa takutippaat inuussutissarsiorneq ilimagisamit aningaasarsiorneq pitsaanerusumik inerineqartoq, taamaalilluni aamma Nunatta Karsiata naatsorsuutaani 2016-imoortumi nunatta karsia ataatsimoortumik 211 mio. koruuninik sinneqartooruteqarneranik kinguneqartoq, naak miffarfissualiornissanut 200 mio. koruunit aningaasaliisoqarsimagaluartoq. Taamaattumik Siumumiit oqaatigissavarput iluarisimaaratsigu aningaasaqarnikkut ingerlatsineq. Taamatuttaaq iluarisimaakkatta ilagaat suliffeqarfiit Namminersorlutik oqartussat pisasaasa sinneqartooruteqarluarnerinit landkarsi pissarsilluartoq, tassa 300 mio. Koruunit missaanik.

Taamaattorli aamma ukioq naatsorsuuteqarfiusoq pillugu imaattunit apeqqutissaqarnerput oqaatigissavarput:

Namminersorlutik oqartussat nammineq nakkutilliinerat qanoq iliornikkut pitsaanerpaaffissaminiinnissaa qulakkeerniarneqarsimava? Taamatuttaaq sulineri periusissamik allassimasunik naalakkersuisoqarfinni ersarinnerusunik peqarnissaanik siornatigit uparuarsimasatsinnik nutarterisoqarsimanersoq paasissallugu soqutiginarparput.

Taamatuttaaq apeqqutigiumavarput qanoq ukiumoortumik naalagaaffimmit tapiissutit ukiumut qaammatikkaarlugit tunniunneqartarnerata suut iluaqutissartarinerai aammalu ajoqqutissartarinerai.

Taamaattorli naggasiullugu oqaatigissavarput iluarisimaaratsigu Sanaartornermut iluarsartuussinermullu aningaasaateqarfiup ukiuni kingullerni uparuartarsimasatta ukioq manna nalunaarusiorneqarnera pisareeratsigu. Tamanna taama oqaaseqarfigeriarlugu Siumumiit kaammattuutigeqqissavarput aningaasat illikartinneqareersut sapinngisamik sukkasuumik sulitinneqartarnissaat qulakkeersimanerartartariaqarmat.

Ineqi